

Familienausflug anno 1923

Zwä Kinner tuen ihrn Vatter plach  
Mir möchtn a mal n Ausflug mach!  
Ar nimmt sichs zu Herz n -  
Ihn its für nix läd  
Ar mecht seiner Kinner garn a Fräd.  
Die Mutter its glei mit eiverstana  
Mancha Bedenkn - mancha Banga  
Schlägt sie außerm Kopf  
denn sie hat ümmer Muet.  
Sie hat a schönes Kläd und n neua Huet!  
"Däß Kütschla voll wörd - ment sie dabei  
lod mer zum Mitfohrn die Tantn nu ei.

o n Sunntog-Nachmittog its souweit  
Es Räs wagela steht vor dr Tür bereit!  
Dr Vatter mit sei groösa Schnorrn  
Setzt sich zum Kutscher nauf ganz vorn  
Es Fritzla dörf vorn drauf dezu  
Denn hintn geit dar doch kee Ruh.  
Ar will dr Göll ihr Zügl halt  
Und Peitschn knalln, daß weit naus schallt.  
Die Mutter hat ihrn Stohahuet auf  
Da it a ganzer Gartn drauf!  
Bluma, Kersch, schwarza Beer,  
Fadern, Bender und nu mehr!  
Es Retela mit sein Dirndl-Kläd  
Hat die allergröötta Fräd.  
Es hopft und springt zum Kütschla rauf  
Und setzt sich brav zur Mutter nauf.  
Die Tantn ham sich schöa gemacht  
Voll Reiselust es Herz ihr lacht.

In Gottes Nama fohrn se fort -  
Durch Walder, Wiesn - Ort zu Ort.  
Fast bis Dettelbach fohrn sa nei-  
Unterwegs kehren se bei Verwandta ei.

Es wörd geplaudert - sie frähn sich all  
Stundn vergähn - doch die Sunn scheint nu hall.  
Hemwärts wölln se en Ümwag mach -  
Zwä Göll und so a Kütschla des it halt a Sach!  
Sie singa Liedli und spanna Sunnaschern auf  
Mit dr Peitsch wörd geknallt -  
im Galopp gähnts drauf.

Doch mittn in ihrer Fräd  
Wörds dr Fahrgäst hintn läd!  
Sie schrein "Halt!" Laßt uns runter!"  
Es Wagela senkt sich ganz nunter! -  
Es Röd gäht raus  
Ganz schräg hergts no -  
Sie springa alla ängstli ro.  
Doch wörd dr Schödn glei behoum  
Die Kutsch wörd örscht a Stückla gschoum.-  
S it repariert - die Fahrt gäht weiter  
Dr Himml - grot nu hall und heiter  
Betrüebt sich schnall - o Graus!  
A Stormwind kümmt in Sauß und Braus!  
Dr Kutscher schreit "Halt Euch o!  
Denn was nit fest it - fliegt dewo!"  
Großa Tropfn platschn munter  
Vom Himml auf die Ardn nunter.  
Scho blitzts und dunnerts rings umher  
Die Göll die renna ümmer mehr.  
Dr. Ragn patscht - es Wasser rinnt -  
Da läßt auf emal nach dr Wind.  
Dr Himml wörd hall - die Sunn scheint raus  
Die Reisegsellschaft schnauft tief aus!

In seiner Wucht hat dr Storm  
Die Schermli und die Hüet verdorm.  
Dr Manner läft - o je!  
Es Wasser raus in dr Hosebee. -  
A Rageboun gnööß und bunt  
Spannt sich überm Erdnrund!

Die gleiche Farbm - mer gläbts fast nicht  
Hat die Mutter in ihrm Gsicht!  
Vo dr Verziehrung auf ihrm Huet  
War des die Farb, denn dia war guet!  
Noß sen sa all - vo oum bis untn  
Die Schöaheit vo allem it verschwundn.  
Vorbei der Gspaß, vorbei die Fräd  
Vorm Spott im Dörfla its ra läd! -

Und doch - wia heut -  
über Tal und Höha  
War damals trotzdem so a Ausflug schöa!